



謹齋詩稿

淮海 許志進

辛卯年上

題石谷子黃山畫冊

○
趙子邀我黃山遊輕裝欲發逾三秋吳君寄我黃山記
山川景物供雕鏤鐵師袖出山圖三十幅恍如置身軒
皇雲海之峰頭千尺巒岈橫几案撲人空翠蒼烟流珠
砂湯上佛子宅桃花源外仙人樓天橋石門側身過玉
屏丹鼎誰所留烏目山人心匠好雲峰松石窮探搜弟
子楊晉妙皴染入室最比羣工優尺幅收將萬仞勢巖

巒變幻煙林幽山僧面壁得真趣新詩似欲追貫休禪
定餘閒敲韻語清猿晝叫山魃愁如此名山不住出何
求碣石斷雲迷渤海遼陽歸鶴依松楸爲問何時瓢笠
返雲海與師杖履同優游

題射陵輿頌冊子贈某明府

舊說廉平六計先仕途真見幾人賢金多酷吏成超擢
政拙迂儒半左遷人虎眈眈方攫食口碑嘖嘖塵防川
一編輿頌饒公道不羨輕裝載石船

感興再題二首因寄滋菴

政以賄成今一概不貪爲寶古所難黃流倒灌江淮濁

爲問何人洗肺肝

滋菴句云清風傳播江淮上多少人聞洗肺肝

得喪誰能概楚凡升沈且莫判廉貪年年巧宦爭遷擢
多少龔黃不自慚

題梅花書屋

海山仙人冰玉膚游戲碧落凌虛無隨風咳唾霏瓊屑

化爲香雪黏虬株

拓地新結廬寒香幾樹花紛敷

捲簾對雪興不淺招賓命酒同清娛苦寒笑彼山澤臞
尋詩風雪敲疲驢何如晏坐梅花書屋裏共君花間浮
白如披圖

送老鐵兼贈淵上人

流雲必懷山逝水思其源君賦真湛性老依不二門十年面石壁悟徹都無言瓢笠返鄉間雲巖夙契存禪關夜雪暗水國春雨昏朗月照碧波冥心忘衆喧惟應清淨身坐起叅玄論

戲詠泥小像因示老鐵

泥土形骸任自然金鎔絲繡匪天全却看野服疑非我獨坐山堂又幾年塵面籠紗還失笑寒巖枯木當叅禪山僧舊解空諸相好爲今吾證體玄

二月初五夜渡江風雨雷電交作抵京口已三鼓

矣題僧樓壁

怒濤作意捲瓜洲驟雨驚雷撼客舟蟄地蛟龍春自起掀天風浪夜何求似聞雞語三更後乍見禪燈古渡頭獨倚軒窓重搔首一聲長嘯坐江樓

江上贈詹叟

兩年數放江東棹此度重來似踐更雲裏衲僧多掃榻津頭漁父盡知名名山春入還攜酒古寺花開又聽鶯更欲從君問丹鼎刀圭分乞學長生

江上看花題店壁

照眼睛光動柳條又看桃李絢江郊輕明映日橫籬角

爛熳烘霞上竹梢
火迫春林眯醉目
風吹香雨點塘坳
去年冰雪荒村暮
記策寒驢月一凹

招提寺

徑爲聽泉覓門因
看竹開禪關人不到
齋鉢鳥飛來
殘雪埋幽澗
新萋破碧苔
老僧厭岑寂
留客試茶回

游清寧道院

白雲如練抱山斜
步入清寧羽客家
山靜日長春盎盎
石壇開遍玉梅花

宿聽潮閣

欲覓心從慧可安
半龕燈火對蒲團
潮生靜夜空巖響

月挂高松古殿寒
行脚疲爲山水役
披襟起坐雪霜殘
鄰雞一唱江天曉
過眼千帆鏡裏看

重遊潤州諸勝和韻十首

斗酒雙柑白日斜
空山重訪戴公家
野桃修竹春風裏
不見南朝玉蕊花

招隱寺

虎跑一勺未全枯
足練兼天勝已無
兩過山田藉春草

閒看地底濺真珠

虎跑泉 此泉舊是飛瀑今止水一泓而已珍珠泉在山下平田內

重到林公舊講堂
莊嚴龍象護天章
參旗玉槊知多

少且就山僧擷筍嘗

竹林寺

鶴林松竹覆殘碑
虎臥龍跳蹟已非
不及竹林修竹賦

大書深刻有光輝

鶴林寺

溪山幽處記吾曾，趺坐松陰問小乘。襪被擬爲三宿戀，

只愁櫻筍累山僧。

八公巖

江雲羃羃樹毵毵，冒雨重尋海岳菴。知是老顛開畫稿，

狂來潑墨寫烟嵐。

海岳菴

過雨還登北固巔，千峰淨洗翠便娟。分明一色柴窰片，

嵌作江南二月天。

甘露寺

青鞋布襪事閒遊，可怪人人識故侯。解與青山爲主客，

不妨終日醉江樓。

多景樓

鐵柱峰前臥石羊，依稀舊事問周郎。英雄豎子名俱朽，

廣武西風弔戰場。

狼石

五州山半梅花塢，斜倚松風對玉缸。春色斷腸人境絕，

最宜高枕看滄江。

因勝寺

題界陶明府歸來圖

淵明古靜士，高臥凌軒羲。區區五斗謀，徒爲三徑資。興
發賦歸來，不緣鄉里兒。清風寄五柳，琴酒相娛嬉。遂令
千載下，頑懦懷芳規。先生超世情，塵埃謝鞍羈。閉心契
松菊，扁舟寫淪漪。不知蓮社朋，何似柴桑遺。披君歸來
圖，感我黃綺思。

舟次白田

○柳色上晴煙湖光白鳥邊暖回春雨後風定落花前歸
夢侵寒食牽舟過白田明朝應上塚悽惻感流年

丹厓宅上觀海棠賦詩二首邀諸賓同作

一樹中庭絢綺霞芳樽又喜宴名葩玉環倚醉臨妝嬾
通德無言擁髻斜百六晴過寒食雨十分春在舍人家
年年花下同清賞敢對嬌紅惜鬢華

人柳眠多起正遲海棠睡醒日高時一花占盡人間色
自古誰爲絕妙詞豔極難持春不管嬌多無賴醉奚辭
名葩綺語宜相發好繼西川范陸詩

題僧徹照

坐破蒲團撒手行一條筇杖萬緣輕等閒無法與人說
龍象同參作麼生
竹皮笠子青秧鞋半生游戲水雲隈何人謬舉禪公案
教吃山僧拄杖來

和南村使君阻風西崦二首

六浮閣外梅花放載酒人歸二月中惆悵虎山橋畔月
枕函欹側鯉魚風

歸客臨風意惘然扁舟西崦夜如年玉釵紅燭春閨恨
知在山塘淺水邊

觀演醉鄉記傳奇和韻

日飲亡何計最良百年假面弄西涼衣冠大抵同優孟
功德居然讓杜康放浪形骸天幕小淋漓冠幘酒人狂
紅瑜五夜笙歌沸我亦翩翩入醉鄉

戲和三首

杜牧春尋悔却遲不成僚壻怨紅絲絳紗弟子依都講
怊悵娘待字時

障扇曾聞誚老奴玉臺佳話滿東吳柳枝記訂濺裙約
難道羅敷自有夫

寧老空閨母作妾此言雖痛亦堪嗔衆星皎月通明夜
應笑嫦娥是忍人

和南村二首

翠掩垂楊草似茵閑園偷訪洛陽春過墻蜂蝶真無賴
爭趁衣香逐麗人

看竹何須問主人隔籬辜負牡丹新狂香豔色知多少
消得陳思賦洛神

楊大椿惠新茶歌

春雷夜雨驚龍蛇園官夢破探枯槎旂槍初展粟粒小
筠籠封裹飛傳車遠隨苞苴走豪貴兼金一器誇新芽
書生欲買孔方少難從色味求精嘉先生何處得此蕊
一團綠玉香凝髓分餉如叨孟諫議松風活火煎鉛水

主人烹成試一嘗清和耿介兼芬芳雪花雨脚頗苦口
如噉諫果回甘涼世間喉舌失正味膏唇醉吻無涇渭
了知此妙少人知玉川桑苧非今時品茶且復歌新詩
拍頭生活行東恪菴

畫家筆法紛殊途拍頭生活古所無章聖亶聰有創

始烏捷入水毛蘇蘇

先帝拍頭畫
牛賜近臣某

堯文羲畫一運掌千秋

韻事開文儒絕技向推高水部

其

才情敏妙心膽麤墨

磨三斗乃染拍淋漓萬象隨所塗須臾變幻盡百態對
客談笑呈清娛飛鴻雪泥印拍爪藝林好事珍驪珠邇
來幾輩效塗抹妍媸異趣分施模學我者拙似者愚妙

處不傳逢擲揄君攻此技殆天授意匠獨運天為徒請
君出手為數紙沸沸十指烟嵐俱氣運生動勢欲活可
憐畫手皆傭奴鳥爪作字更工絕墨痕袍袖從沾濡君
不見張顛醉後以頭書

試茶贈丹厓

霍山有瑞木錫山有甘泉清泠浥露華芳馨和蘭荃採
擷當春雷烝焙及晴天頭綱分貢舫調水煩吳船朝來
忽餉我茶水同新鮮熊魚乃兼致渴吻生饒涎砂瓶活
火鐺階前手自煎魚眼現澄瀾松濤寫淪漣候湯不待
老真味希天全冰雪澡肺腑妙處忘言詮譬彼醉中趣

難為醒者傳

看芍藥長句贈誰莊主人

君不見廣陵芍藥天下稀舊譜爭誇金帶圍六百年來
風景異曹州亳州花最奇誰莊老人老好事名園麗錦
光紛披牡丹千朶十日盡殿春芍藥翻宜遲夜來風雨
大作惡拂曉尚有三千枝主人興發召賓友花間觴
同淋漓嘉名肇錫舊多種一一變態從所為王劉品列
三十九古無今有誰能知主人種花極花趣薄暮更為
花催詩翻階傍砌有名作咏花不工愁花嗤主人學為
老農圃豕鬪自冒多田譏山林經濟得管樂娛老服食

追安期

安期生有服芍藥方

名園高會列萬本維揚勝事仍依稀諸

君但醉不須辭好花常恐東風吹

月夜讀方舟詩有懷

春水大江深烟花客思侵誦君邊塞句感我寂寥心筵
冷娛賓醴臺荒市駿金思君若明月風露對披襟

修墓遇雨

殯宮朝祇役風雨矢哀音水齧災非意防崩涕不禁伊
蒿三載痛宰木一林陰高敞何時得難為烏鳥心

讀費滋衡說漢詩

唐宋分宗派無人說漢詩讀書用我法著論解人頤蘇

李才相合風騷道未衰君看十九首何似大風辭

郭供奉于宮撰集金人詩告成有寄

風騷千古事異代網羅餘不有遺山老金源蓋闕如論
文一尊酒徵實幾車書名彥金閨客還應更起余

懷史蕉飲王令詒二垣長

抽簪同海岸朝局幾更新無復彈冠意真為弛擔人行
歌正則悴病免長卿貧左掖多清詠差堪步後塵

贈蕭布衣凌曦

六代王孫裔滄桑有子遺感時一杯酒弔古百篇詩夙
世真詞伯多生豈畫師人間龔聖子清節少人知

登舟寄越中友人二首

獨上扁舟去蕭然物外人山川饒勝概領略及閒身越
絕晴嵐碧匡廬秋色新琴書還伴我觸熱向江津
兀坐殊不樂飄飄賦遠遊滄浪放歌去未信有離愁山
月照杯酒江風吹客舟平生禽向意瀟灑寄滄洲

黃浦道中二首

助虐有驕陽爲霖靳彼蒼空餘河水碧不漑早苗黃井
稅輸方急時清計合長古人溝洫意好與事循良
憂天吾左計望歲亦惟咨旱魃方持令乖龍意可知扁
舟射陂路五月蘊隆時盱食求言切何人爲正詞

是時畿輔不雨

下詔求
言甚切

白田懷無功太史介夫明經

柳外繫船處長懷大小山射陂煙草碧鷗鷺自閒閒

過珠湖懷蒼巖太僕止堂明經

三點五點黃昏雨一寸二寸白小魚青草湖寬浸鷗鷺
綠楊風細颭芙蓉蒲帆畫舫高沙道老屋荒城故相居
安得相招大小阮文游臺上一共余

文游臺和阮亭先生韻因寄懷

髯蘇先生千載人文章風節凌嶓岷新詩游戲一脫手
胚胎萬象生芳春後生嗤點蘇黃體異趣何啻猿王孫

當年憩棹清淮濬把臂恰逢孫

莘老

與秦

少游

朋來况有王

定國名賢聚會風雲振鬚眉朗映冰壺潔高臺百尺光

嶙峋熙豐宰相惡直言廟堂攘利紛更新一官落拓亦

何有愛看山水東南奔

乞得一郡東南
奔唐人句也

江淮往復到儋耳詩

篇照耀滄海濱一杯遥酌孟城土悲歌慨慷招詩魂神

龍變化不可測行止任運惟天民黨籍未沫權奸死白

骨狐兔穿管榛吾師望古緬遺蹟層臺改築加鋪敦演

漾湖波珠絢彩雲煙日月相吐吞前蘇後王兩作者濟

南文獻高于鱗秦工張易皆及門瑯琊緒論吾所聞

張文

潛未秦少游觀二公淮揚間人
東坡嘗言秦得吾工張得吾易

露肋晚泊

三十六陂水連漁村蟹舍晚生煙露肋祠下泊船處
時有驚魚動白蓮

紅橋泛舟偶題僧舍三首

畫舫湘簾五月涼隋堤披拂柳絲長田田夢雨蓮塘水
儘放妖紅鬪豔妝

九曲池荒不可尋迷樓螢苑總銷沉誰將玉笛翻新曲
大似當年水調音

樹外江流寺外山山堂醉客一憑欄煙花十里揚州夢
寄興僧樓落照間

訪樸菴太守新居留別二首

枳棘焉能托鳳鸞空將畚鍤名賢行窩地買新安樂
吟社賓招舊月泉江外雲山看疊疊竹西歌吹自年年
文章太守風流在點檢詩囊有一錢

霖雨何當濕焦槁栖鳥且復揀卑枝不成賈讓陳三策
空笑梁鴻詠五噫此日甘棠依蔽芾異時霜菊賦離披

昔在淮郡同鶴鄉
諸子咏菊最工

與君暫作扁舟別五老峰頭坐詠詩

江舟即目

潮滿煙江水未平揚舲又聽櫂歌聲鼃鼃蹴石顛風冷
樓殿烘霞落照明白鳥卑飛渾舊識青山有約似逢迎

銀鱗入網京清美坐對金焦看晚晴

金山

汗漫希盧教名山吾賜履江界一拳石探奇自茲始臺
殿敞虛無扁舟半帆駛長廊轉空碧孤塔寫煙水一柱
砥中流千峰落杯底鼃鼃吞日脚雷霆薄山趾祇應飛
仙游鶴駕凌清泚澄潭濯明月幽巖餐石髓何年徙蛟
宮樓閣增蜃市浩劫運罡風沙塵捲穠穉惟有玉帶橋
清流映君子

望焦山二首

不訪焦山去北風吹客舟松寥今夜月夢遶白雲遊

寒夜踏崩石曾探瘞鶴銘潮生催櫓急望裏一峰青

陵口夜泊有懷耳公叻夫及山中諸道者

山靄蒼蒼月上弦江聲活活水侵天半灘蘆葉兼風雨
幾拍歌喉入管絃公子焚香吟夜閣老儒篝火對殘編
遙知白足黃冠侶清楚還丹總未眠

丹陽道中懷千里同年

百里雲陽道清風送客艤曲流巴字峽高岸子陵瀧樹
密通村市禽喧帖水窗元龍高臥處湖海氣難降

陵口夜泊

通江河水暮潮生雲隙依稀漏月明兩岸烟林如織處

夜涼閒聽水車聲

曉過呂城

江東五月峭寒生枕簟涼多夢不成夜半嘔啞聞櫓語
曉風吹過呂蒙城

水車謠

箕舌嘯風不嘯雨頑雲障天乾后土扶桑九日焦江流
掉尾饑蛟吞渴虎旱魃小兒耍天公剪桐食采分江東
江山草木生秋容傳說在野天無功江東父老逞狡黠
空山尋取龍蛻骨雌者槎柯雄碲砢十人五人同作力
機心機事與天爭踏骨引水縱復橫轉輪尚作饑龍吟

老牛夜喘山魃驚濁泥汨汨江水竭幾時漢法烹桑弘

桑弘蓋馬脚
葛亮之意

梁溪道中懷貽京同年

夢醒蠡河雨扁舟杳靄間雲邊見孤塔樹裏認煙鬟酒
美醉鄉路泉清陸羽山懷君不相見幽興寄孱顏

登惠山絕頂望太湖歌

吾聞海外有九州何人親向環瀛遊蓬萊弱水不可到
天風浩蕩吹行舟憶昨散策浮玉巔月明風靜江油油
荆門夔巫半帆耳欲窮萬里探飛流扁舟偈仄不快意
洞庭煙水澄雙眸振衣一上九龍頂風潮五月生涼秋

烏檣薺樹青瑤裏蛟龍出沒龜蜃浮平煙滉瀆玻璃冷
劃焉長嘯天蓋頭形勝東南具區藪真靈窟宅天人游
金庭石室渺雲海洞天林屋深幽幽七十二峰望不極
青螺蘸水漂鳧鷗我欲輕舸弄湖淥漁洋法華當可留
不妨徑作五湖長咽漱沆瀣驂玄虬此身會見生羽翼
列仙攜手凌滄洲

虎丘贈僧用東坡舊韻

寺門敞空翠曲磴盤高嶺金碧炫樓臺老樹蔽巖井蒼
茫沉劍處隧道天宇耿虎氣騰金精寒流咽池暍空傳
五都士銀雁闕穿曠高僧啟禪扉密行持精猛千秋名

勝地臨眺幽懷騁稍嫌青松詩鬼語雜悲哽登塔一長
嘯煙嵐明萬頃天風吹絺衣溽暑生涼冷殘碑訪顏陸
逸事搜明永明月來窺林高峰銜暮景可中亭畔石錯
立森寒影捨法而說法轉語爲師請

五人墓

一壑聚精靈殘碑幾字銘草深埋血碧松鬱夜燐青魂
傍要離塚寃沉貫索星空留直道在幽憤閉泉扃

生公講臺坐月贈季友松如二首

上方燈火閉禪關夜靜人稀水石閒要看虎丘真面目
一天明月翠微間

蓮花清漏管絃殘露坐聊消此夜閒拊髀莫教談世事
只須浮白對青山

訪日容同年不值

扁舟張翰思可是爲尊鱸舊雨停雲館清遊明聖湖風
懷寄桃葉老淚拭童烏
日容有西河之勳時方挈眷游杭也
興盡王猷擢題詩
付獠奴

與鶴峰話舊

時爲吳江令

滄海程才借玉衡那堪留滯尚專城官同楓葉多時冷
人比江流一樣清刀筆趙堯誰及料下中李蔡夙相輕
鶴峰以館職補外久困劇邑積薪居上蓋近二十年矣
明庭舊侶江湖在煙水逢君白髮生

吳江驟雨

洞庭雲起遮山黑蒼龍掉尾天潑墨須臾猛雨挾奔霆
跼跼輕舟拍鳥翼江東枯旱苗未立踏水田頭人戴笠
可憐尺寸蝸涎濕倏忽驚看鯨噏吸雨脚斜飛過別村
雲峰泔泔碎魚鱗布帆斜日吳江路清遠鷗波看釣輪
又雨復晴

晴雲矗山峰雨雲疊鼇脊頃刻成晦冥萬弩射潮汐紫
電掣金蛇炎官驅霹靂青林飛駭浪蛟龍頓移窟初疑
五湖水欲混江海白此身將安歸扁舟搖兀兀稍稍歇
崩奔漸漸聞浙瀝虹梁闢天門光射陽烏赤雲開雨亦

止明月上空碧惟有沙鳥鳴清風戰蘆荻

長橋玩月放歌

我既不學李白騎鯨魚澄江捉月凌虛無又不能學海
客乘槎犯牛斗支機持贈天孫手扁舟醉狎五湖魚煙
水蒼茫笠澤口空山夜蛻玉龍骨瘦削楂柯乾佶傔靈
威丈人逞狡獪幻作長橋互撐突十丈百丈相勾連一
稜頑石橫浮煙巔巔立足鰲戴首秦皇睨視誰能鞭東
山月出星照水龍女弄珠宵未眠我來賒月滄浪天憑
凌大叫驚羣仙冰彛擊鼓老蛟舞金枝翠旗光燭淵飄
飄御風身冷然瓊樓玉宇不歸去浪跡人世今何年

長水道上

勾吳舊事弔姑胥遺恨休探越絕書范蠡湖邊桑沃若
由拳城下水沮洳風流不見嚴夫子忠讜長懷陸敬輿
歎息東南文獻盡寂寥空過子雲居

時竹垞先生
死二年矣

贈石門介巖都憲二首

五湖煙艇混投綸語水溪邊訪隱淪翟尉張羅門寂寞
衡山導氣骨嶙峋憂天髮白三千丈報國身先十九人
點簡平生冠劍在待公重與正陶鈞

老臣謀國矢孤忠往事休教問赤蟲慙直幾煩思汲黯

尊榮曾許詠蕭蒿

先生在都下曾述先世
明德屬余作詩紀實

賜環每幸蒲輪早載

筆終期汗簡公獨拜牀前聞善教自嗤薑桂性相同先生

甲辰進士敷歷中外近五十年余自辛未釋褐先生引為忘年交今亦二十餘年矣

題摩頂贈言冊子為勞公少子

競誇丹穴羽毛豐犀角星躔果不同且課詩書娛暮景

莫祈愚魯類髯翁少年共認王曇首他日應呼小許公

平輿預家聲擅題品座間心折老成風

感舊為介巖先生

讀書博塞兩亡羊三窟何人計最良廊廟江湖徵現在

楸枰零亂不成行

為長白顓侍御題三友居用蘅圃侍御韻二首有序

杭州巡鹽御史公解為南宋別殿故趾蒼松古梅映帶竹石所謂三友居者歲久無考侍御發土得石碣揭而顓之數百年舊蹟晦而復彰一時名流多詠其事余繼和焉

斷石銷殘劫蒼松異代餘六陵移故宅三友得幽居雪

羽鳴深翠庭前古松白鶴巢其上江雲動碧虛武林遺事在懷古意

何如

院靜全消暑蟬稀書不譁鶴歸栖老樹苔長弔寒花宋宮

舊有苔梅高孝二宗花時宴賞傳為故事節使風流擅江山異日誇還應稱四友

著我在煙霞

普照院贈僧二首用前韻

借得清涼地征人病暍餘未探巖壑趣且就水雲居翠

竹天風動煙林夜月虛天台有遺旨趺坐迴如如

院僧楚公為天

台後人

長日關門坐當機一笑譁觀心時指月避熱亦尋花
病經涼減青山向客誇聽君真實語如見赤城霞

用前韻贈繪友彥公瑤采二首因東田居少渠

共把驪珠句相看息影餘培風起鵬翼攻玉借山居竹
樹全忘暑道心方集虛賞奇兼快友羈客更焉如

地遠人同靜林深鳥絕譁名山懷舊雨世事認空花小
閣分僧舍新詩向客誇白洋池上水移酌醉流霞

浩軒太宰先生過訪偕田居話舊因東二首兼寄

介巖都憲

曾挹清風對玉除

甲申三月召對乾清宮問天下大吏清操余首舉先生以對

歸舟肯載一錢

無懸車似欲追疏廣垂釣何須乞鑑湖拙宦平生羞
散老成多半愛菰蘆病夫不是安昌客也約彭宣命酒

徒

先生自言久不暢飲因訂田居同為醉鄉遊

冥鴻蕉鹿費疑猜二老風流越水隈廊廟經綸誰奮跡
東南耆舊盡歸來春明往事思塵夢洛社長年托酒杯
羈客病餘堪作健爭雄旗鼓對尊罍

少渠過訪留酌拈句多入禪語聊戲答三首

不須搔首問天公把酒同遊醉國中十載佯狂成玩世

却從醕酌說真空

佛門公案此重添彌勒維摩證地兼

彌勒善飲
維摩善病

偏袒右肩

獅子吼醉訶三十二莊嚴

酒多轉笑次公狂成佛生天兩未妨偶向三生認圓澤

水煙山靄笛聲長

次少渠韻二首

通神役鬼揮錢力履尾編鬚暴虎餘畫地易成名士獄

幕天真作酒人居

少渠以某方伯誣陷繫狂狴
幸而不死乃有回祿之厄

醉窮禪味兼三昧

狂攪詩情徧六虛不見幾年惆悵極劇憐衰鬚雪霜如

朋歡聚散風萍似談笑依然舊日譁酒陣醉塵滄海月

歌船夜宿聖湖花寓言不厭莊生誕史筆無妨左氏夸

且幸子輿身健在清詩如綺散明霞

題冷真子照和元韻四首

畫作老僧趺坐一獅馴擾
其旁上海顧生立先筆也

鑄有黃金繡有絲等閒付與虎頭癡壯心降伏空山坐

只許文殊師利知

蒼髯綠鬚盡成絲往事閒論是素癡全力漫教摧戰象

夜叉狡獪更誰知

山鬼無勞嘯鬚絲老僧枯坐絕嗔癡拳毛吼處風霜變

不露威稜那得知

鵬奮針芒龍化絲饑蛟渴虎兩貪癡茶煙禪榻松風冷

莫遣獅兒鼻孔知

用韻再詘勞都憲二首

先朝耆宿沛新綸舊德如今豈久淪

上特沛恩綸存問 章帝舊臣凡七人康熙甲辰進

士獨李司空元振及公在耳

夙性桂薑同老辣後凋松柏獨嶙峋丹心夢

捧雲中日冷眼閱看局內人大厦不傾梁棟力匡扶誰

更秉鴻鈞

不辭艱險竭愚忠冰雪原難語夏蟲國是安危視毫髮

天心運轉莫恒嵩平生落落幾知己大節堂堂獨數公

屈指中朝湯魏後

湯公斌魏公象樞

風猷誰得與君同

寄懷會符上舍兼寄魯瞻

歲宴別君處懷人江上春

今春有詩寄懷時客江山幕中

吳山不相見越嶠

尚依人我憶同丙子君豈雌甲辰頭顱俱老大曲逆乃

長貧

食楊梅東田居侍御

舊愛楊家果年年五月時論筐買光福染絳似徐熙酸

少輸盧橘香多亞荔枝分甘且龍井竟日朶饒頤

西崦

西崦山房接太湖水天煙景入蓬窗六浮樓閣仙人杳

青鳥傳來信有無

余病暍留武林十餘日湖山舊游咫尺未得一往

瀕行作十詩志別兼謝友人佳招云

湖上雙峰吾舊識兼旬客病倦登臨夢回禪榻蕭蕭雨
誤認南山水樂音

記聽南屏寺裏鐘寒松烟雨暗迴峰幾年不改青山色

吟過長廊僧不逢

時南屏化
老已寂矣

招賓同上暗門舟十二橋邊載月遊最憶中元燈火夜

玉人歌管亂沙鷗

南山遊徧北山回三竺雲林夕照開醉向冷泉亭上坐

一峰天際忽飛來

仙靈隱處幾名賢老去殘僧不解禪成佛漫希靈運後

文人慧業自生天

荷花如綺葉田田吳女如花唱採蓮同和鐵仙新樂府

一時游冶任喧傳

羽衣吹笛放舟遲月冷三潭浸釣絲忽見天光明照水

蛟龍驚起夜吟詩

翁山深處桂花香一榻秋煙月滿牀明日虎跑泉上路

松風吹斷白雲涼

山樓水閣徧題名記與髯翁策杖行今日岷峨人萬里

棧雲千縷蜀江清

時留驂
在蜀

庚清鮑俊日經過蕭寺論文載酒多

謂慎兼江聲葦江葛
谷迂谷西友諸子

惆

悵林巒虛舊約移文應受北山訶

和田居懷孟舉舍人韻二首

阿蠻歌曲秦娘簫吳楚相望道里遙鳥哢飛花春恨切

舍人家畜聲妓以風花雪月命名頃聞皆散遣矣人依皎月夢魂消扁舟夜雪難乘興落

葉江風獨詠騷今日吟詩同許洞許洞吟詩禁用風花雪月等事風流雲散

悟虛飄

酒陣詩魔總泥人多情杜牧善傷春嘲風弄月神猶王

醉雪題花事未陳歌散綺筵悲後夜夢醒香谷悟前因

老年風味真黃葉舍人自稱黃葉老人且與逍遙現在身

題瞻園懷舊詩卷和竹垞韻五首有序

園在金陵中山王舊第其孫六岳老人所闢龔太常開藩江左一時名士如陳檢討其年朱供奉竹垞輩數十人前後遊其間飲酒賦詩稱東南盛事二十餘年賓主星散沈南渟作懷舊三十首田居和之石谷子繪圖竹垞題其後今南渟竹垞皆已物故卷中所存三四人耳余因感而和之

名園擅勝石城東山樹樓臺翠掃空二十餘年懷舊雨衣冠多在畫圖中

供奉新詞對譜填柘枝狂舞醉歌筵如今白髮思前事
帚屐風流態可憐

聽雨西湖翠幙張荷花千柄鬪明妝南渟曾寫田居西湖聽雨圖甚工瞻園雲

樹棠陰合幾許寒鴉噪夕陽

硯峰青並傷玉蟾蜍水閣三間伴著書無用西臺闕白

筆不妨隨意註蟲魚

田居新構
水軒最潔

郢雪歌傳屬和遲知音地下亦吾師白門寂歷瞻園路
魂斷東陽瘦沈詩

寄懷紫扶邁園兩同年

視草明光客舍香畫省郎掖垣同夕拜時論動朝陽封
駁謹師古糾繩切大防神羊矜觝觸寶劔礪鋒銛 聖
主優殊睠羣工忌太剛朴忠心自矢愚戇俗相妨芻燭
輸明哲多言畏醒狂虎占履尾啣鳳覽德輝翔越海人
千里吳天水一方蛟峰蓬島近煙艇釣臺長鱗逆批驪
死弓彎射馬強朱雲方請劍臧穀已亡羊笠屐成閒適

漁樵雜退藏山光凝客枕樹影拂匡牀病劇遊全嬾醫
多藥敢嘗推蓬便偃仰散髮任相祥碧浪春江路青鞋
越嶠裝未逢皇甫湜轉憶賀知章出處關吾道升沈聽
彼蒼

何時起高臥丰采振巖廊

楚公文室用田居韻因懷莘野

袒衣竟日話支公聒耳風蟬院樹中繞屋荷香扣西隱
白洋池外水連空

鐵山池館梵宮添城市山村此地兼

地爲張浚故宅
鐵山浚之號也

長日閑

門修止觀無勞慧舌轉楞嚴

重到湖山歲月非僧樓夜雨聽依微香煙不動虛堂靜
坐看晴雲一縷飛
吟興依然舊日狂閒因病得且徜徉若爲更上扁舟去
山靄蒼蒼江水長

江干二首

青林一抹鳳山平客路嘔啞聽櫓聲搖過市橋三十六
吳山相送越山迎
病暍虛爲廿日留雲巖悵望舊曾遊青山細雨樟亭路
夜聽潮聲上越州

江聲

江聲浩何許一夜枕江眠明日推篷望青山繞客船
江上望會稽山色有懷西河先生二首

浙江南去路最愛越州山翠簇千峰出波明一水環奇
書悶宛委禹穴失躋攀何日樵風便空憐興盡還
好是山陰道青山遠趁人煙鬢認西子翠黛似眉顰蓮
唱耶溪女鹽羹雉尾尊風流王謝遠江水碧粼粼

宿處

宿處青青江上峰朝來失却幾多重白雲堆裏日初上
露出天邊三四松

百里

百里臨安道山開見塢田林昏烏柏兩嵐重碧江煙跋
浪知魚樂閒滕愛犢眠山村差可喜六月不聞蟬

贈李富陽

曾上春江樓上望扁舟此日恰重來雲峰舊識橫眉黛
煙水依然釀綠醅石鏡重探衣錦樹羊裘更訪釣魚臺
風煙無改山川美十載逢君鬢雪催

觀山曉發寄懷田居江聲諸子

樟巖霧雨落紛紛兩岸青峰上白雲風送梵鐘清夢破
櫓搖孤艇客程分赤亭山下嚴陵釣天子岡前孫氏墳
欹坐無心更懷古一江煙水憶離羣

富春雜詠六首

不識鶴飛處空傳天子岡五官江上歎大是怯孫郎

故人江海姿安知凌帝座太史誤占星非干子陵臥

官客星有五凌
犯各有所應

擁篲兆焚阮幽居在巖壑君看申子龍何如范孟博

蟠隱居

靈龜不隱泥奇禍得烹煮老樹漫多言明日逢斤斧

葉李漳州竄周旋出死力安童致書來朱清不相識

桐君不可接遺蹟翠微間落日雲巖裏何人採藥還

泊桐廬二首

辛卯年稿上

船邊潑刺起跳魚鏡裏寒波浸碧虛薄暮雲昏鐘磬暝
隔江燈火辨桐廬

採藥曾逢服食仙十年重訪舊風煙飛昇未就塵緣在
更借桐君一榻眠

江行書興仍用東坡新城道中韻

神輿縹緲御風行稍厭鳴蟬聒耳聲雲擁奇峰堆翠黛
波明斜日漾金鉦重看野塢園林好舊愛江鄉水石清
十載楊朱歎岐路知津且欲問農耕

上灘

青瑤倒蘸碧玻璃撼地江聲越嶠西夾岸峰高似巫峽

上灘水急認閩溪曾輕砥柱三門險

癸未扈蹕西巡狩
因有三門之役

最愛嚴

陵七里迷一葉中流吟嘯適斷崖千尺竹雞啼

懷紫扶二首

青山不動白雲浮曉日荒荒江水流西泝桐廬三百里
子陵瀧外是嚴州

千重雲氣萬重山望斷虛無縹緲間家在東西臺畔住
真應消得此生閒

登釣臺題子陵祠下石壁

扁舟冒炎歊肩袒脚不襪病暍笑喘牛拘囚謝投謁稍
喜桐江清豔濯明月衝飈捲怒濤帆駛不可歇竭耒

東西臺狂興頓勃發奮足躡蒼厓健於摩霄鶻冠服古
先生科跣太唐突以我世外人差得免呵咄青山臥白
雲煙景互明滅先生逝已久高丘長碑斫幽巖琢鬼斧
磊塊互撐掇蒼松挂寒雨夔夔嘯重樾憶我昔乘輶過
此殊倉猝塵襟不敢上畏為山靈兀今茲野鹿游宜入
煙霞窟山泉漱我齒天風晞我髮鱸魚上釣輪山中足
薇蕨何人識故侯糠秕問官闕時有野人道
余姓名者

下山口號

又別名山去依依戀翠微鷓鴣啼不歇觸熱向南飛鷓鴣

性向南飛

弔古二首

怒爭裴相題碑絹狂攫昌黎譽墓金一種風流兩奇士

夕陽煙水共銷沉皇甫湜

丞相檻車走塞塵叅軍痛哭祇傷神西臺便是田橫島

乞器與無家一剩人謝翱

戲東玠園太守

使君吏隱一身兼占斷雲山傲老嚴獨飲釣灘灘下水
便教分餉未傷廉

龍山道中感興作

烏龍何盤盤江流齧其足千仞會噴吼風景清且淑時

平事農畝林樾蔭深綠尚憶荏苒符傳嘯聚繁幾族遺趾
方氏廬戰壘斬王躅金衢控甌鄞山峒帶蝟蠋蠢蠢弄
戈鋌戎莽時一伏前年大嵐變禍釀妖僧酷鳴狐驚夜
戍揭竿驅駭鹿懼為盆子僭疑誤王郎卜滄海尚揚瀾
司寇已具獄此事在朝廷安危任司牧莊躋坐 廟
郡職臣僕林藪徒區區標攘終赳起君看龍山址虓虎
饜人肉

蘭溪道中

浦江新漲蹙盤渦平齧山根十丈多雲裹亂峰藏洞穴
波迴怪石踏鼃鼃三江浪次龍門險六月寒增虎背過

尚憶月明城下泊素馨香裏玉兒歌

三河晚泊

一眉新月做黃昏收盡東巖返照痕畫角呱呱如雁塞

此地夜
獨吹角

烏篷落落似漁村占星幾夜思霖雨臥病經時愴

客魂江瀨不鳴風力軟三田默照靜存存

小邑

小邑倚蘭江生涯碧水菊香生賣花手韻逐踏謠郎粉
堞明如繪山樓曲著行煙嵐一千里風景似吳閭

金華詠古十首

老守東陽惠澤長峴山遺愛似襄陽仲堪去後風流遠

淚灑豐碑字一行殷仲堪房師柏鄉先生曾守此郡故以仲堪事為比

大隱名山不可招金華空翠撲蘭橈一杯遥酌龍川水

如此溪山着孝標劉峻

不見烏傷馬鬣墳松楸遥望一沾巾萬家高敞京江上

南北東西愧此身顏烏時先大人未葬

草檄應慚仕偽朝英雄栖遯一無聊江潮海日年年似

驚嶺龍宮空寂寥駱賓王

仗義勤王切枕戈同讐兵甲未蹉跎斬王退老岳公死

遺恨無人敢渡河宗澤

每按遺書論宋儒東萊道脉貫程朱後人競愛姚江學

畢竟良知致得無呂祖謙

漫嗔兩省市私恩乞外聊應為老親若罪當年呂頤浩

大書奸黨是何人潘良貴

竊馬易逃辛棄疾上書竟理喻南疆書生醉後狂多少

更乞君王鑒醒狂陳亮以醉後狂言下廷尉孝宗釋之更上書請移都建業以制中原不報

例變龍門異代承庸才蕪穢不堪稱宣文閣上遺書在

班馬何人筆削能張樞著續漢書七十卷

風雨聲中松化石雲山深處石成羊樞衣徑逐初平去

不要稽康石髓嘗黃初平

水碓傲昌黎體

辛卯年稿上

雙湍撼廣輪八碓撥修輻天旋十二時地轉三萬軸
應大小穿湊均內外穀其下走逝波其上覆茅屋廣輪
自週迴八碓互擊撲機事漢陰捷春傭臯廡速白匪德
曜舉磴音拔豈公輸續肢體逸操作粒食致精熟馬磨失
鞭笞牛車輪輻輳義御遲浴淵桂奩爭縮胸倚杵逼圓
蓋搗藥勞撲握覺藥屋沃古通今叶箭激駭連弩音清奏琴筑川壅
淺無潰輪安巧不覆未暇論疏淪且足快耳目宇宙四
大盡萬彙一飽足左掌運山河右角鬪蠻觸九州真浮
漚滄溟同一粟天倉峙紅腐水碓琢寒淥

晚過龍游懷張廣文琦因寄林廣文徵徽

張官龍游林官定海

向晚穀州道樓臺一水長江山入平遠雲日自蒼涼石

室煙林寂村稷水碓香

時已有新穀溪邊水碓甚多

闌干堆首宿冷署憶

懼張

髯也今奇士文章迴出羣餘溪清徹底

林家武康

蛟嶼氣凌

雲江海人同老悲歌硯未焚公車他日詔對策惜劉蕢

衢州詠古三首

龍丘謝徵辟躬耕亦自活何事殷深源書空常咄咄
棋局麈殘劫人間歲月多可憐爭黑白不值一樵柯
神仙驂鸞游飛昇拔其宅江郎亦何為山頭化頑石

壬午閩闈分校得人最盛一時有癯張髯林之目

曉市

曉市紛煙艇深村尚曙雞人家寒淥外僧寺翠微西瀨
淺魚兒細林平橘子低九峰何處是杳靄望中迷

西安夜泊

市倚江爲柵烽依石作臺疲兵無近用散木乏長材戰
地雲常黑巖城劫有灰管絃深夜裏煙月碧於苔

箬帽灘

已狎層灘險飛流箬帽多建瓴看豔瀕激箭失黃河地
積三衢上舟輕一鳥過漁梁灣更險回望碧嵯峨

張堆港

倣昌黎體

五人牽船頭弱繳風鳶線兩夫撐長篙投體學蟻緣三
老立水底背舟雙股拈衰嫗把舵杆摇摇舟尾顫齊力
上奔湍作氣敵洄漩進尺退則丈濤衝勢欲旋人語闕
灘聲充耳誤覲面亂石八陣磧驚波連牛箭雖非千仞
懸倒曳一匹練鳴嘯風雨驟震掉蛟龍戰篷窗困欹兀
坐處奔濤濺阨險力莫助迫隘目屢眩豈有性命憂頓
笑身軀賤却看順流舟飛來席一片風利不及收已攔
沙水澱後舟監前舟半帆拖倒牽長空下健鳥曲岸流
疾電道路有險易人事有常變利涉占習坎胆力黃頭
擅龍門呂梁游洪波出安晏

放鴉詞三首

樟樹潭邊碧水流定陽溪外聚漁舟放鴉不過雞鳴塔
扣拍悲歌似峽州

不辭沒水濕毛衣作活因人得飽稀應羨鷺鷥青草立
銜魚逐侶任高飛

漁蠻生計足魚蝦一葉隨身碧水涯聞說長官窮利孔
只愁搜索到魚鴉

黃埠道中二首

橘林如織水西東黃埠灘頭震澤同戲語會稽饒內史
霜時分餉越溪紅

苦桃列樹怨騷人羅帕分珍感侍臣橘實青青橙子綠
千林風露涉江津

定陽道中先寄松南同年二首

七百重灘險青山股脚連懷人深翠裏得句碧流邊水
急村村碓林高樹樹蟬定陽官舍晚風細北窗眠
不識金川路溪山西復西林深烏角擾山靜畫眉啼病
劇遊人倦峰多望眼迷高齋翠微裏好借一枝栖

十里灘雨泊

金鴉影掠翠巖西十里灘前路欲迷浪捲三江舟奪港
兵塵萬馬雨連溪山頭獨樹疑人立林外幽禽似鬼啼

月黑雲昏看虎獵
眈眈碧眼睽荒谿

望三衢山

舊說衢山險奇峰
鳥道通黃牛
下巫峽仙掌擘河潼
百粵開蠻服
三江辨禹功
玉龍巖洞好煙靄
入鴻濛

謹齋詩稿

辛卯年中

淮海 許志進 念中

定陽奉恩寺雨中偕松南同年用蘇集荅參寥舊韻因贈問渠禪老

○
青山繞郭溪流清
雙峰軒翥誇嫺形
北山寺古陰喬赤
雲巖棲遯入中英
我項停舟借禪榻
涼生六月煙雲冥
蒼髯滴翠森岵嶇
玉槩梢露凌崢嶸
軒窗樓閣失炎暑
已公茅屋支公劓
清風淨掃冰簟滑
夢破剝啄山鳥驚
忽看飛蓋入寒綠
始知林壑通巖城
竟日追歡不覺晚

笑談雷雨喧中庭神氣風霆合龍劍故人幾輩稀琴星
十年再涉三衢水巉巉獨有千峰迎一官滋味同冰冷
百觚磊塊澆塵輕醉看簷溜瀉飛瀑空傷聽雨僧樓情
即今甘霖潤九野滂沱六月方時行江淮漏澤靳涓滴
故鄉回望憂惓惓我生譬彼鷓鴣飲所求造物當易盈
仙山且欲拾瑤草草鞵行脚成孤征老僧笑指新羅去
雨止月出金波傾

僧舍三絕句

一江巖壑逐人行夜夜江流沸耳清山寺寒濤驚客枕
半窗紅日煮茶聲

○翻盆驟雨數聲雷竹外清泉泱泱來六月山中秋事早
墻陰已見海棠開

齋心不語對瞿曇香飯流匙玉版甘我是維摩病居士
只無天女與同參

時道暘未痊終日坐臥而已

贈僧

定慧全生戒律賒三乘全演一牛車前身定有蓮生舌
垂老虛堂轉法華

讀錢朝采江行看山詩愛其瀟灑倏俛和韻奉懷

兼眎天農

○牽舟看山逸我足江行坐饜熊魚欲白波翠嶽非人間

未是飛仙也離俗昔我空泛客星槎水驛山郵自催督
千山過眼等一瞥妙處輸君摹寫酷讀君麗句添我狂
我來君去殊參商波平風軟舟緩緩初擬一山賦一章
纍纍珠貫萬峰走後山未去前山當一峰入雲一峰出
雲山相逐爭軒昂安得君詩鬪便捷或開畫稿分毫芒
山不必高江不廣居然秀潤勝平聲荆揚層巒凹凸帶巖
穴伯倫天幕窮視襠欲往從之愁絕倒隔江遙望停煙
航赤亭几案青霞窟溯游宛在波中央江流曲肖青山
曲山峰長學青天長秦皇東巡鞭不得蛟龍飛舞神人
僵扁舟西泝八百里千灘水急鳴湯湯江山共喜故人

到把臂况有平生張青山一縣畫圖裏憶君轉使心茫

茫 錢詩有云畫屏翠幃圍百里容我一葉浮中央清波照出螺髻俏遠天畫得修眉長忽然雲生山割裂一尖獨對青冥僵可稱工妙也

然犀

巨憨有稽誅奸萌及剪除竊鈎真小盜強項一狂且司
寇誰持法俘囚得上書然犀燭幽隱罪案定何如

慧安寺二首

西高峰畔路古寺說唐餘劫火留喬木神龍護寶書梵
僧能宴坐羈客一逃虛爲問殘碑字兵戈幾廢墟
樓開翠微上碧殿淨無塵行脚一居士牽船兩應真峰
高看樞馬樹古認莊椿日暮杉篁冷蕭蕭天籟音

飲荔枝酒用前韻示愚仲

閩游一事意未足江珧馬甲百不欲願噉楓亭荔子漿
一洗胸中十年俗昔遊已後開園期今我不行誰促督
十日病臥山寺冷欲往最憚炎曦酷佳釀馳來喜可狂
開尊欲啜還自商美酒病客兩相妨停觴先與約三章
甘芳祇許滌肺腑病在下體非所當一軟已得心清涼
再吸倍覺神激昂瑞露流馨通九竅玉漿行氣開針芒
唐羌驛走紅塵筐惜不作貢荆與揚幕天席地醉爲鄉
塵寰偏仄虱處褻憶昔紫微白刺史遠致一斛牽吳航
仙人冰膚絳羅裳玉壺澄澈明中央荔子蜜漬沁喉舌

乞漿得酒滋味長十夫對舁過漁梁觸熱疾走喘且僵
竹崎山中風露香困關溪流湯湯恨不一葦凌煙江
行止信由天主張清醪幾蕉瘳夙疾作歌醉舞天蒼茫

夢遊歌

有序

昔持節使閩以不得遊武彝啖荔子爲憾因名詩集曰虛槎項余客定陽距武彝不五百里扶筇戴笠徑欲褰衣屈指到竹崎日十八娘猶堪朶頤也大暑流金山堂偃仰採薪未瘥空托臥遊夜中夢到武彝豈山靈招我稅駕乎作夢遊一篇以廣其意因質之松南並寄閩中諸子焉

我頃東過武彝君幔亭峰頂披層雲青山不改人代遠
大笑下界皆仍孫煙艇一曲棹歌聞蒼茫山樹籠斜曛
十年此意徒虛語忽然夢到清心魂不成桃源迷子驥
轉擬天台懷劉晨夢裏神遊無不可更須閉目窮其真

翠屏九曲橫煙水飛梯千丈懸雲根仙人洞府敞虛碧
紫陽書舍留荒墩興來徑逐白雲去東游欲看扶桑暎
延溪兩龍挾風雨雪峰天柱高嶙峋越王臺迴雲化水
螺女江清月趁人鷓鴣啼處香滿園荔枝丹顆落紛紛
一啖三百不歸去長竿釣鰲滄海濱彭臺島嶼三十六
壺公日月東南奔蓬萊宮殿見縹緲行追安期招羨門
翱翔虛空騎赤鱗不然空山坐忘身胡爲勞勞逐世塵
僧寮跂足松濤喧夢中說夢紛多言東峰曉日明金盆
會符自須江過訪松南招同卜夜用蘇集荅舒教
授觀墨韻因邀同作

松關逃暑汗流泚清晝香煙靜憑几興當佳處輒揮毫
新句頻添數番紙竹兜軋軋君肯來足音空谷足然喜
木棉嶺峻日車側役夫喘汗吳牛比冰簟雲濤樹影涼
據梧清興寧逾此主人行庖滑滌醴轟飲不嫌河朔鄙
酒陣橫開壁壘嚴歌喉朗徹笙簧起高鬟白皙紫雲兒
隔座嬌鶯呈皓齒淳于未厭薌澤醉孔融只怕瓶罍恥
人生百年須快意此外誰煩天料理座有清冰瑩玉壺
不用浮瓜並沉李爭王奪霸酒生禍往事興妖誰作使
戊子春夏間松南在都與同人爲醉鄉
之樂未幾有十月之變或者以爲識云醒人自愛醒而狂醉客終耽
醉鄉美便便井腹發書厨萬卷抽探悉源委廿年學殖

已荒落得法焉知皮骨髓歸路巖城夜析中月明山寺
清於水

松南和前韻見東復此奉酬

和詩有云百年未了濟時事
坐看先生致端委故後及之

松南放衙每拊髀案牘無留有空几斗邑寧須着此人
且作書魚鑽故紙新詩送到要平屬和仄韻鬪奇君輒
喜十六驪珠唾手來詩似人清清莫比詩書等是無用
物未審先生何愛此滿堆阿堵笑王戎作達聊消吝與
鄙我上羲皇便平晝臥山齋剥啄緣君起飲冰君欲滌
其塵漱石吾將礪吾齒衰老無聞古所誦有道賤貧非
我恥世事悠悠任去來此生久達莊生理山中未出留

遠志道苟不食全苦李聚散星萍吁可念詩魔酒陣從
驅使雲壑全耽六月涼山川最數三衢美經國何須話
廊廟憂天正恐慚端委月明鬼語笑龍鍾日昃膠黏煎
鳳髓待君鼓鬣化鷗鷗吾當擊起滄溟水

後飲酒

有序

愚仲因余憶荔枝乃以荔子釀飲余余作飲酒一篇松南招同開化大
令會符上舍復為卜夜之歡愚仲又以楊梅漿勸客開化以為不醖更
呼他酒自酌余輩夜深散去開化
與主人泥飲達曉乃用前韻戲東

鼯鼠飲河吾易足君肆鯨吞恣所欲一軟仙人紫玉漿
頓覺齋廚官釀俗從事青州失到臍未論鬲上平原督
客惡不嗔嗔酒惡應惱當杯彈去射酷憑凌大叫興轉

狂風簷暢飲聆宮商屏山冷翠高壓屋清陰夏木紛千
章荔子釀赤楊梅頰流霞碧椀差相當烏程下若陵州
白清濁未易分低昂冰丸瑩澈清清泚火齊紅簇森森
芒良醞瀉出麻姑槽月明絲管聲悠揚雪膚仙子凝酥
腕皓齒歌兒紅羅襜清風庭院開五斗絕勝壑谷撐煙
航是日初擬泛舟破石未果千鍾百榼對賢聖觥籌交錯夜未央劉伶
畢卓逝已久醉鄉日月空云長君不見羲和叱馭凌扶
桑夸父奔走渴欲僵不如安坐飲美酒酒泉碧玉流湯
湯小戶醉逐啼鳥散拍浮獨羨髯與張後堂滅燭就明
月東方欲曉天茫茫

題天然僧樓鐸

空山一雨氣如秋枕簟涼生病欲瘳為愛杼山吟興好
松濤撼地一登樓

輓座師京江先生六首

敬和 聖製元韻

老成淪喪塵 溫綸歎息無人佐玉宸夙夜戰兢咸一
德太平黼黻久維新紫垣光迴星辰暗綠野堂虛草樹
湮白首 聖躬紆旰食那堪揮涕為宗臣

廿載中樞筦 帝綸特將恭謹契嚴宸循墻莫侮黃扉
老 賜杖初驚白髮新舊德久留編簡在重泉未遣姓
名湮化成久道天行健轉為心傷憶舊臣

五月二十日 諭九
御略云朕御極五十

年待大臣如手足如蔣令德衛周祚李爵杜立德馮溥黃機吳正治王熙
宋德宜梁清標李天馥張英熊賜履吳瑛陳廷敬皆以年老告退得以林下怡養保全名節其在朝與朕同事者無不鬚髮皓白矣宿學老臣紛紛辭世朕每傷心痛哭今又有大學士張玉書之事朕悲悼不已故作輓詩一章與卿等知之

昇平海寓看彌綸五十餘年侍 帝宸丙魏功名遭

主聖歐曾文學濟時新璇璣齊政分虞績洪水沉災佐
禹湮勲業巍巍心更小故應操履冠儒臣

嘉謨入告沛如綸温樹何曾泄禁宸洛蜀不分門戶少

鹽梅相劑鼎羹新匪躬蹇蹇占无咎奉詔期期事未湮

此日回天安社稷 山園 定來臣

帝心哀悼布恩綸華袞榮褒下紫宸玉匣斂形邊塞遠
朱提荷賜上方新橐鞬瀚海星霜變風雨燕然字畫湮

兩字文貞光燮理太平 天子誅勞臣 丙子北伐公扈蹕出塞者三常年避暑皆以公

從故今卒於口外 上憫公清貧賜梓材內帑命大臣一人護其柩以歸

憶昔丹扉廁掌綸尚書喉舌贊 楓宸封章 棲遲

久冠劔凝塵拂拭新世業韋平看繼述危言汲鄭 淪

湮 帝庭良弼知多少痛哭商巖夢裏臣

雨後送愚仲返棹

臥聽蕭蕭雨空堂一夜秋曉登西閣望雲斂北峰頭山
寺銷殘暑江風送去舟病夫題句嬾客路感淹留

旱魃

閩天旱魃沴時和宵旰真勞 玉體瘡燮理漫教咨丙

吉轉輸空說用蕭何揚波易狎鯨鯢險攫食誰言雀鼠
多聞道揭竿能不死頓恢商網宥么麼

時招降海賊
陳五顯等

遊嚴谷八首

古木蒼藤纏不分照人秋水碧
泫泫眼明萬疊青山路一半松杉在白雲

靈湖村畔盡平田竹樹蒙茸翠巘邊
稻熟溪喧添水碓家家碧玉到門前

披藤覓路入深幽草潤雲陰萬木稠
行到洗心亭上坐一潭寒雨濺飛流

翠黛黏天雲破碎青松影日山玲瓏
行人聽水寫幽思

時有疎鐘韻碧空

青山長共白雲閒暫得閒身止看山
不及僧閒無罣礙

開山占斷白雲間

山有妙喜寺 本朝戊子巳丑間
洞僧語浪初開實擅此山之勝

通隱何年遂卜居焦先蝸舍住君廬
趙公巖路通嚴谷清獻先生此讀書

趙公讀書巖
在嚴谷東麓

應有仙人跨鶴昇萬重嵐翠鎖空層
興來更訪水源去青嶂題名記我曾

無用蒼山老樹封碧天堆疊萬天蓉
淮東儘有寬閒地移取青青五百峰

晚遊破石

茲晨起作健命駕成清游巖谷弄白雲迴身探龍湫澄
潭浸空碧疊石窅深幽山晚簇沉嵐江煙幕林丘驚魚
時潑刺出水如有求我欲攜桂楫沿沂青瑤流乖龍睡
方酣靈珠當可偷何人秉犀炬醜惡窮蛟蚪月黑走香
車颯然風雨秋扁舟放飛溜漁火明沙洲平生丘壑情
眷言茲略酬泉石痼膏肓幽憂良已瘳

石門山

十里見空翠望中雲若屯行行近青峰拔地撐孤根長
林帶層薄號號鳴湍奔山翠夾迴溪其下通一門遊人
昧重險側足隨澗猿高高不可上佳氣日氤氳東行開

林巒照曜扶桑暎西飛挾靈雨倏忽翻天盆飽聞穴
豁中有神物存氣候均子午吐納應乾坤

山中白氣一縷子出
午收長十餘里東晴

西雨不
差其候

乃知出岫心鬱為雲雷屯悠然自捲舒此理誰能

論

黃岡山

山為趙公鼎隱居地有三賢
堂祀公及范公冲魏公石

幽意殊不愜蠟屐登黃岡高高天際頭立石巉以僵俯
視衆峰底雲海浩茫茫此境非人間坐定真欲忘吁嗟
趙忠簡屏跡來投荒范魏兩名賢空山同退藏拾橡分
猿猱飲澗隨麇麇虎豹嗥其前豺狼睨其旁山魈偕木
客白日恣跳梁豈不懷險艱時哉悲穹蒼千秋栖遯地

草木留馨香放歌招隱詩擊石聲琅琅

食石螭用昌黎食蝦蟆韻同松南作

石螭蟄幽巖如蛙魁厥貌俊味失江珧蛤蟆非可拔錦
襖纏玉膚斑斕謝蕃炮高棲恥下濕生理遠濁淖山靜
夜無聲似厭羣鼯鬧如何競掩取豈奉廩師教先生哆
饒口夢破黃紬覺烹茗敕廚娘活火戒焦爆登盤饜老
饕牙熬羞鄭校攻疾類蚘蛇圖經列明效我憶南食詩
斂手興一撓去豈無魚蟹族割鮮求籩罽屢勸煩公言
下箸姑亦稍人生恣口腹百物殊嗜樂鮭腊捕蛇鼠湯
爛臠麟豹鷓羹或療妒鴉炙亦教孝當筵兩拊掌觥船

撥雙棹

疊前韻

戲用演雅體

堆甲厭鱉帆惺眼憎蛇貌爾螭一何辜味與魚鱉校鳴
蝮有褫衣老蟾亦解炮脯醢到龍麟螺蜆收潭淖巧伺
巖石裏詎緣池沼鬧焚身鑿象齒退麝知誰教吾聞生
物微禍福炳先覺元夫燭幽隱剗剔仍遭爆鼈巨或吞
鈎熊猛亦繫校爾螭美且腴烹煎聊自效河豚甘一死
惡啖疇為撓我行山澤間弱肉資繒罽大嚼快屠門廩
餼來官稍龍虱閩越珍蜜啣炎荒樂腥臊各有慕貪狼
謝廉豹食鮭笑庾貧烹雞偵茅孝閔我持螯手輸芒問

撥棹

聞道四首

聞道溫陵賊猖獗幾邑同頭銜稱大義手語笑元戎輸
輓徒虛語風聞有 達聰重臣諳治體奏牘說年豐
往者樓船役降旗映日翻鯨鯢清海嶠將帥滿中原蛾
義種仍非望凶門略可言 聖朝寬大詔不殺待孫恩
徐鉉元唐士無諸本越人高官羈逆子厚祿誘降臣水
旱丞卿免奸邪盜賊嗔誰能念桑土斂手報黃巾
手靖強藩禍消烽亦有年邊疆庸帥足將相 聖躬肩
日月經天正伊臯奉職虔潢池真赤子故智弄戈鋌

用前韻再詘松南

空山一雨生秋清頑疴頓欲甦委形令君佳句爽心口
如嚼冰雪咀芝英山城酷暑鑠金石流雲沾濕遮高冥
蠻山障目不可鏟何人一夜移崢嶸眼明身健客愁醒
鈍鐵稍復礮新礪媧后補天石五色陰多石裂天爲驚
詩人例得歷窮餓三年落拓留荒城麒麟鳳凰不恒有
來瑞聖世揚王庭誰令蹭蹬在山谷稱去我江湖占客
星當歌對酒一快意落筆千斛珠璣迎槎柯病骨疑有
鬼興來起舞身渾輕酒酣耳熱到人事杞人漆室空餘
情萬言伏闕定誰採書生高論難施行伊周稷禹滿廊

廟何與卿事心悲憫急觴且復掩其口東林素魄方虧
盈竹外清飈動白帝涼天買棹吾遙征擊楫秋江弄星
斗回看河漢西南傾

點問渠詩畢題其卷端

詩人例作贈僧詩詩情禪味頗相宜鄭谷雲臺三百篇
獨無僧字嫌其卑

谷有句云詩無僧字格還卑蓋晚唐人習氣如此

我客屏山困小疾

竹風松月開禪扉問公老去詩轉工讀之時復成解頤

點頭許石知真諦解笑從花識妙機

問公有鹿眠春草細鷗戲浪花寬寺古松垂老山高

月到寒雨暗秋聲亂花明月影虛興從幽澗入意在亂松中溪雲流案濕花露落庭香樵客伐薪雲破斧漁郎鼓柁月黏衣句皆可錄

山高月

寒草露濕亂松雨暗雲黏衣空山槁項有如此誰能辦

作門牆麾杼山清江不可得錄之聊足風髡緇他年續
編弘秀集應笑餘子空得皮

弘秀集皆三唐僧人之詩

以詩易畫

有引

畱驛向寫秋山書屋圖余題四截句驛亦和之竹垞朱先生留之齋中謂當步韻相寄距今四年所朱既化去驛亦剖符於蜀圖殆不復存矣項在松南齋驛見今甥錢君大幅宛似圖中風景乃作詩以貽松南乞此圖並索和焉

仕宦不羨執金吾三十封侯真丈夫功名蟬蛻一敝屣
高臥名山方讀書蹉跎十載稱諫議掉頭長嘯還菰蘆
抽簪強仕未云早五岳汗漫恣所如南面百城書萬卷
山中快讀忘朝晡挾策亡羊臧穀殊東隅未晚收桑榆
前年憩棹明湖水兩峰秀色黏衣裾秋山書屋驛手塗

晴嵐翳翳山有無丹楓翠柏映平蕪雨溢寒泉噴巖壑
風吹黃葉飄庭除苔斑踏破來吾徒賦詩飲酒同清娛
詩成持示長水叟老筆欲攫驪龍珠我頃東來星籥改
叟歸天上髯巴渝定陽官舍秋山裏眼明忽見秋山圖
錢郎丘壑生腕底清詩快欲追髯蘇牢之之甥似其舅
才情秀發心膽麤此圖風物自妍美堆嵐滴翠明青矚
白雲在天流水遠松風謾謾鳴禽呼一人坐讀山樓孤
一人步屨蒼藤扶兩人襟抱略相似置君巖石言豈誣
行藏自斷身未老千秋業在非逃虛江風山月我友于
青緗黃卷吾師乎以詩易畫成軒渠被儂移得青山去

便抵仙人碧玉壺

余前詩有移取青青五百峰之句松南題畫詩云先生愛我錢甥畫恰似秋山書屋圖四百驪珠憑乞取竟移

嵐翠入歸壚錢君名贊
虞山人詩畫工妙可傳

觀武后石淙紀遊碑

金亮吳山遊太真溫泉浴匪增巖壑奇祇發山川惡清
清石淙水不洗天后辱當其司牝晨構禍一何酷宗子
無劉章將相非平勃堂堂姚狄賢靦顏隨產祿石淙纔
一窪僻在荒山麓麗非大明宮幽豈黃金屋老尼何愛
此則天老年塑像僧
寺乃一比丘尼也雞皮托休沐不見北軍變誅戮到宗族
廬陵方侍遊從臣十有六巖谷交雨風涼陰散煩熇詩
成迭賡和奇字不可讀

則天詩有均露均霜交風交雨之句詩大抵崔融輩代作中間用所造奇字如◎坐生患之

類羣臣詩字亦皆效之碑為汾陰薛曜書

久視以紀年應憚隙駒速狄姚礪楫才

旋乾轉坤軸蘇沈與崔李文學亦耆宿豈其張武儔周

旋甘碌碌

蘇味道沈佺期崔融李嶠及昌宗三思輩皆侍遊

時哉天厚媯英雄同赳赳

汾陰美書法碑版照寒淶筋骨開顏柳庚庚饒瘦玉唐

書摹晉人大率作臣僕君乃操鐵兵鬪骨不鬪肉赳赳

譌陳倉癸巳泐周穆空令千載人摩抄一顰顛

觀元祐黨籍碑

奸邪害忠鯁朋黨禍最酷嗚呼宋中衰乃與桓靈續我

觀元祐碑長謠當痛哭知人昧明鑑忠奸乃反覆共謹

筦中樞畢散為圯族巖巖僕射京書罪昭信獄曰光曰

彥博十百同拍錄厨俊登渠魁顧及各標目是皆為黨

人罪死不可贖皇帝甚寬仁肆宥屏荒服死者奪其爵

生者靳其祿立石戒萬禩扶摘甚刑戮厭禍有穹蒼風

霆碎欺誆忠良故無恙權奸旋覆餗國是日顛危塞馬

遂南牧殘碑留姓字異代蠹巖谷古者奸邪害略可徵

簡牘大抵聰明主其蔽甚庸碌其失在苛察其病在多

慾小人緣以進諂佞蠱流毒正士視若讐攻之嫌不速

羣邪為輔車城社相連屬乘間抵其隙戈鋌弄蠻觸斯

高蔽羸聰中原逐駭鹿楚懷惑子蘭三閭乃放逐江充

構巫蠱泉鳩成不丁髡鉗逮北寺炎燄灑一沃牛李互

相攻唐祚隨以促韓史柄政權趙李同挫衄東廠坐闡
奴羣賢共傾覆賢人國之紀多方事鏖斲彼昏初不知
鴟鵬視鸞鷲他日思忠良厦頽求一木吾愛皇甫規附
黨曾不恧更愛呂大防顛直從摧扑世亂見節義君子
恥爲獨此碑近千年嗚咽誰忍讀咄哉安民愚書名詎
云辱

大樟行

定陽西偏有大樟八幹排空勢直上蛟蚪蟠攫歲逾千
金鐵莽蒼橫袤丈鱗沙鼈足踏磐石彭亨蛇腹撐蠻象
關山亂定獨完好老歇狂枝謝奔放澗壑陰凝雷雨屯

巖巒晝黑風煙盪古槐寄生久合抱霹靂煨燒失高亢
惟有青青千尺楓摩霄拔地同無恙山鬼披蘿夜跳梁
虬蟉失國朝惆悵此樹婆娑古道旁人間曾閱幾興亡
工師不敢引繩墨留待天子開明堂大材豈得老巖穴
小幹猶堪中棟梁君不見重輪碧海賓扶桑又不見靈
椿歲月書蒙莊撐持巨厦要喬木殘樞短杙非所當吁
噫嘻虎倒龍顛風發屋鱗甲之而看豫章

病起將發常山取豫章道戲作留別天農

我不欲入海登蓬萊亦不欲飛車訪赤松但欲輕身飛
上軒轅峰披雲抗手容成公鍊丹臺前分我刀圭之大

藥沉疴霍然去我躬屐笠飄飄白雲海足踏三十六朶
青芙蓉便不言歸志亦得脩然拚作黃山翁豈期病纏
綿坐困桐江東嚴灘逆上數百里懸舟激水心忡忡故
人邀我金川遊路陬舟航不可通馬金嶺盤三十重高
高直上天穹窿竹兜搖搖投萬仞不愁猛虎愁蛟龍韓
公豪氣挫西華司馬臥病懷東封平生叱馭王陽坂焉
能兀兀傷途窮此山留下待他日匡廬立老招我寒雲
中玉屏九疊巉高空香鑪烟靄朝濛濛草萍西去一條
水扁舟放棹還推篷爽籟秋生病脫體不勞筋力看龍
從此行會入遠公社悵悵淵明恨不同

早秋別意

積雨潤林丘煙嵐釀早秋苔痕侵佛座濤響上僧樓鄉
夢仍依枕江行好發舟生明今夜月爲我照離愁

和松南送別二首兼寄會符

賞音絃指外江海一成連

松南詩云罷琴常自笑何處訪成連東望二千里故人淮海邊

官舍青

山裏詩情老樹邊病軀耽藥畏客路厭秋蟬明日扁舟
別離思夜不眠

輕裝信州路懷玉萬峰西別意誰能耐哀猿無限啼挂
帆向彭蠡煙樹共低迷最憶屏山寺涼陰倦翮栖

龍山遊殊未暢聞謝源幽勝及讀書巖皆不及訪

作二詩寄妙喜僧

巖谷層巒裏思爲十日留還過石門限名山更訪謝源流
巖壑籠深翠風煙動早秋客行殊意嬾夢遶白雲遊
筍輿懷玉路極目亂峰中回首龍山翠依然在碧空巖
扉讀書處猿鳥想高風他日經行便題詩訂贊公

竹杖

採得龍山竹鏗然玉一條憑君訪丘壑翼我上雲霄高
節紛相錯貞姿看後凋終知化神物江海足風潮

發定陽抵玉山登舟却寄松南三首

今朝美風日復輿吾西征臨岐不盡歡握手良朋情四

山生白雲槭槭楓柏晴迢迢豫章路念我扁舟行山川
自鬱蒼景物生秋清中年愴別緒客意常怔營陶寫托
詩篇登頓開神明行歌激清飈巖壑相送迎

磽磽紆石徑纂纂迴松岑幽幽苦竹蹊青青楓樹林雲
鬢梳濕翠四面殊晴陰經時臥僧寮幽憂客恨侵一肩
林巒間滌我瀟灑襟回頭三宿處啼鳥空繁音更愛山
樹稠石傘蔭崎嶇悔不霜後來雲錦看蕭森

艸萍連白石巖岫分千重經過屏風關乃涉信安封蜿
蜒向百里巉峭排崇墉三清及靈山高遠知幾弓洞天
闕深處崖石留仙踪猿鶴解迎人躡衣徑相從峰迴林

影分古堞殘陽紅倦客憩輕舸極目煙水東

玉山道中

一徑丹楓樹陰森白晝昏青山馳驛路黃土刈麻原斥
堠無烽火秋田有稻孫遙遙石傘里煙景入深村

屏風關

山矗屏風疊城頽雉堞紆巖關分楚越險地介交衢戎
馬通強寇昇平守一夫廿年寅卯亂生齒困崎嶇

謂耿藩之變

今夕

今夕夫何夕維舟玉溪阿仰看黃姑星昱昱方斜河駢
頭有烏鵲接翅排天波弦月照雲裾灑灑深宵多人間

好兒女嘉會常蹉跎行子感離心旅夢縈煙蘿露下風
船涼扣舷成浩歌依依懷玉人修謁一來過

望靈山

玉溪放船處竟日坐清閒石齒濺寒瀨天衢棧翠顏葛
仙留勝地靈藥想名山未得褰裳去心游杳靄間

題信州橋屋

瀾滄絙鐵穿虛空盧溝鞭石架晴虹洛陽三百六十丈

即萬安橋蔡端明有記

滉漾海水愁漂衝茲橋巋然百間屋行天閣道

承飛龍青山嗟峨白波駛不隨流蕩長崢嶸玉山東津
製雖小亦與此橋結構同信州荒城半榛莽廿年兵燹

成歆崩橋屋潭潭誰所作與人利涉生長風聯船四十
掠江水水波拍拍常不平伐竹結繩勞無功何如築屋
便行坐不施鐵柱沉蛟宮

焦石行

過玉山百餘里山色青潤略如越中自焦石渡以西石色紅黑大
似焦釜二三百里皆然初見頗嫌其惡久而忘之乃作此詩

焦石渡西山惡劣頑石盤空鬪頑鐵一石千丈爲一峰
十峰百峰相拘挾涅如釜底未剔刮黑於鰲脊莽撐凸
蒙茸草樹妝媚嫵淡抹林烟歆瘦月天工作意弄狡獪
吳越青峰太修潔麤礦猛悍自一種大塊胚胎費凝結
鐘鼎古器饒古色翡翠硃砂相間發元人漬墨寫烟景
樹影迷離髹石骨

月夜舟行過此地
絕似元人畫幅

月明山黑宜夜行沸耳灘

聲過砑砑歌成穩睡愛江風夢繞江南山一髮

九獅巖

九獅何纍纍磐石獰以惡嗟峨自蹲踞濤沫互噴薄
磽露頭面爪牙恣搏攫形質賦天工七竅謝鑿鑿拳毛
草蒟蒻壯尾石根格九峰伯仲間駢頭喜躩躍何年走
靈囿躑躅憩巖壑烟樹埋尻睢苔花生肋膊文殊顧之
笑賁獲不敢搏貪奇有老僧龕巖嵌佛閣六時禪誦歇
屏息趺兩脚蹲獅氣未降風雨吼林薄灘高號平猛虎
舟行劣避鯉獅其奮神威蕩此溪流虐

弋陽道中二首

上饒溪水碧湯湯曲抱青林與岸長揮扇獨吟消溽暑
挂帆幾驛向鄱陽童山戴土依然黑灘水揚沙一半黃
悵望巖城孤塔小追懷陳康伯謝枋得感興亡

林開岸遠倚長風竟日軒窗水石中客病易侵時伏枕
逆流洄折更推篷雲山過雨還生白林樹驚秋已變紅
獨有青峰三十二行行相送貴溪東

龜山三十二
峰青翠如畫

貴溪雨發

江靜雨如夢推篷濕曉烟溪邊昨夜月驚斷五更眠

舟行即目

雨細寒輕似暮春獨眠慵起倦游人閒情寄語青楓樹

醞釀秋光惱病身

即事

白鷺羣飛江雨晴山雲破碎水雲清日長睡起烏篷底
又聽村雞唱午聲

即目

青林碧水錦江深日薄雲疎做晚陰一幅溪山行看子
只應難寫畫眉音

晚晴

雨過溪山深染翠秋生江水淨拖藍水天一色金鉦晚
數點歸鴉神廟南

餘干道中

秋山平遠趙吳興
淶水煙林染黛能
着我閒身在漁艇
晚涼吹笛過龍泓

晉興道中

尹潭西去拂殘陰
時有驚魚避水禽
秋熟乍晴如夏熟
蟬音過雨和蛩音
林深樹老樟藤合
岸斷山隤石溜深
雞犬桑麻風物好
女牆低照錦江潯

寄懷北山別駕二首

平輿最數白眉良
別駕淹留且建昌
客路扁舟半江水
鷓鴣聲裏又斜陽

丹霞洞壑敞虛無
酒冽泉香定可沽
我正無人搔背痒
試傳消息與麻姑

晤左崇仁吉之話舊有贈兼懷胡武定慎菴

幾年留滯記遼東
十載重逢豈夢中
紫塞雪霜凝木榻
盱江煙靄落烏篷
故人榆鷄升沈別
往事蝸蠻戰伐空
炯炯冰壺映秋水
巴山夜永一燈紅

龍津

水木澹清暉江晴一鷺飛
人家綠岸住漁子踏船歸
龍臥潭凝雪雲歸雨濕衣
西興潮未到風景認依稀

新溪

一棹入空翠分江破綠苔溪流無限曲人道是龍開

初達彭蠡

挂帆千里外幾日信東風雲樹連敷淺人家略瑞虹湖
圩分曲折山色辨空濛塢口今宵泊秋聲浩月中

趙圩曉發抵滕王閣下

夢回雞唱水雲鄉斜日窺篷枕簟涼幾驛清風下彭蠡
半帆曉日到南郭西山翠障如甌越南浦煙波似建康
突兀眼中樓閣迴一襟秋色弔滕王

章江門登眺二首

帶水合流章貢屏山控引江湖船泊灌嬰城下登高聊

當披圖

秋水長天一色陳言坐詠子安萬瓦江干鱗次無人更
說韋丹

即事

漁網勤收白小江風早熟黃團呼酒玉輪映水龍沙七
月生寒

贈北軒郎中丞四首

閩越巖疆控上游大邦連帥古諸侯江山襟帶蟠三楚
節鉞風猷播八州重譯梯航來職貢高秋鼓角靖貔貅
省方不踏鄣城土宵旰真舒南顧憂

丰儀人說黑頭公左海閭山地望崇名世家風看祭戟
儒生事業寄彤弓憲邦文武懷柔遠報國經綸節制雄
江上豐碑標政績韋丹他日更誰同

滕王高閣擅洪都南浦西山入畫圖帆轉雙江通粵嶠
雲連五老插鄱湖賦詩咳唾臨天表命酒烟波擁座隅
碧檻珠簾秋色裏一時賓佐盡名儒

六橋風月訂心期放浪江湖鬢有絲竹帛功名看樹立
烟霞痼癖笑栖遲致君堯舜須公等老我漁樵定幾時
多病淹留仍作健登臨餘興一題詩

贈王南昌二首

西京政績最三刀司寇才名冠六曹薦鶚幾人餘直道
分符要地着賢豪山環滕閣雙江合雲護龍沙百雉高
今日相逢如夢裏飄萍蹤跡寄漁舸

放浪形骸賦遠遊故人欵我似荊州山川形勝閩相攬
泉石膏肓痼未瘳地險江湖餘戰壘時清兵甲化鋤耨
政平臥理饒清暇尊酒論詩得滯留



